

Nafarroaren  
Eguna

# Sanz: «UPN Konstituzioaren aldekoa da, baina erreferendumak ez du beldurtzen»

Erregionalistek alderdiaren eguna ospatu zuten atzo Elizondoko pilotalekuan

**M**iguel Sanzek ohartarazi egin zituen atzo autodeterminazioa ahalbidetzeko Konstituzioa aldatzeko eskatzen dutenak: UPN Konstituzioa dagoen moduan uztearen aldekoa da, baina aldatzeko egiten badira, alderdi erregionalistak eska dezake nafarrek Nafarroaren markoaren inguruan erreferendum bakarria eta erabakigarria egiteko, eta Nafarroa EAEn sartzeko aukera ematen duen behin-behineko 4. xedapena kentzeko.

Juan Kruz Lakasta / Elizondo



Miguel Sanz, atzo, UPNren egunean, Elizondoko pilotalekuan egindako ekitaldian.

MIKEL UHARTE

UPN-KO kideek alderdiaren eguna ospatu zuten atzo Elizondon. Mila lagunek herri bazkaria egin ondoan, Tomas Caballero omen-du zuten, eta militanteak kopak gozatzen ari zirela Miguel Sanzek mintzaldia egin zuen. Madrilgo egunkari batek atzo iragarri zuenez, hitzaldian plazaratu behar zuen nafarrek beren marko juridiko-instituzionala aukeratzeko erreferenduma bultzatzeko asmoa. Nafarroako Gobernuak eta UPNko presidenteak ez zuen, horrelakorik egin. Horren ordez, erreferenduma egiteko aukeren inguruko «hausnarketa» egin zuen.

Sanzek azaldu zuenez, UPNk ez du erreferenduma eskatuko, Konstituzioaren arabera ezin delako egin, eta alderdi erregionalista Konstituzioarekiko eta demokraziarekiko leiala delako. Alta, leialtasun horrek ez ei du

esan nahi UPN nafarrek Nafarroaren etorkizunari buruz erabaki dezaketenearen beldur direnik. Sanzen aburuz, argi dago nafarrek erabakiko luketena, lau urtetan behin, hauteskundeetan, gaur egungo statusari eustearen alde daudela adierazten dutelako. Horretan oinarriturik, Konstituzioa autodeterminazioa posible egiteko aldatzeko eskatzen dutenei abisua igorri zien: «Konstituzioa autodeterminaziorantz ez ezik, beste aldera ere alda daiteke, erreferendum bakarria eta erabakiorra egin, eta Nafarroa Euskadin sartzeko aukera ematen duen laugarren behin-behineko xedapena balio gabetzeko».

«Euskarak pobretu gaitzake» • Sanzek Nafarroaren egungo marko juridiko-politikoaren defentsa sutua egin zuen, eta hiruko gobernuak bultzatu Nafarroaren eta EAEn arteko elkarlanerako erakundea salatu: «Ez genuen martxan jarri, eta denborak arrazoiak gurela erakutsi du. Hori Lizarrako Akordio nazionalistaren lehen urratsa besterik ez zen». Ildo beretik, iragarri zuen hauteskundeetan ostean UPNk ez duela gobernu osatuko Nafarroaren egungo marko juridiko-politikoarekin ados ez daudenekin.

Horretaz landara, gogor salatu zuen HB. Haren aburuz, Iruñeko Udaleko bilkuran HBko zinegotziak Tomas Caballerori urrezko

domina emateko egin bozketan abstenitzeak erakutsi zuen indar abertzaleak «faxismoan iltzatuta» segitzen duela. Bakegintzari buruz azaldu zuen «kontzesiorik gabeko» bakearen alde apustu egiten dutela.

Euskararen kontra ere gogor egin zuen: «Euskara intelektuali gehiago aberastu gaitzaketen hizkuntzen gainetik inposatzeak pobretu gaitzake». Haren ustez, «ezin dira euskara ez dakiten erdaldunak baztertu, Administrazioari lanpostuak eskuratzeko euskararen ezagutza eskatuz». Euskeraz hitz batzuk egin zituen: «UPN ez dago euskararen aurka, baizik eta haren politizazio eta inposaketaren aurka». X

Bakea  
Caballerori eta  
hura bezalakoei  
eskertu behar  
zaiela esan du  
Sanzek

Eduñe Elizondo / Iruñea. - Nafarroaren Eguna zela eta, Nafarroako Gobernuak lehendakari Miguel Sanzek herrialdeko agintari eta ordezkariak hartu zituen atzo eguerdian, Nafarroako Administrazio Publikoaren Institutuko klausuroan. Nafarroako misiolariak urrezko domina eman ondoren, urte osoko balantzea egin zuen Sanzek, eta arlo politikoan ETAK iragarri su-etena aipatu zuen. «Bakerako bidean funtsezko urratsa izan da; zabaldu den prozesu gure herriaren heldutasunaren emaitza da, gehiengoak bakea nahi baitu».

Sanzek UPNko zinegotzi Tomas Caballero izan zuen gogoan atzoko ekitaldian: «Bakea lortzeko bidera, tamalez, ez gara denok bizirik ailegatu, eta aurren Tomas Caballeroren erailketari egin behar izan diogu aurre; lortuko dugun bakea, hala ere, Tomas Caballerok bezala, gure herriaren duintasuna defendatu duten pertsonen eskertu beharko diegu», erran zuen Nafarroako lehendakariak. Bakerako bidean, hain zuzen ere, Nafarroa ezin dela geldirik geratu, eta Nafarroaren etorkizuna Nafarroak besterik ezin duela erabaki gaineratu zuen Sanzek. «Nafarroako Parlamentuak onartutako erabakiak zehatz-tuko du jarraitu beharreko bidea, baita ezarri beharreko mugak ere; eta muga horiek Nafarrek erabakiko dituztenak izanen dira, nafarrak baitira gure herrialdearen patuaren jabe bakarrak», azaldu zuen Sanzek. X

## Seigarren merindadea aldarrikatu du Orreagak

Nafarroa Beherea litzateke merindade hori

J.K.L. / Iruñea

ORREAGA Plataformak Merindadeen Eguna ospatu zuen atzo Iruñean. Gaizka Aranguren Foruen estatuaren pean egin ekitaldiko aurkezlearen arabera, festaren xedea Nafarroa Beherea Nafarroako seigarren merindadea dela aldarrikatzea zen. Oro-tara 140 kultur eta gizarte elkar-tek eman diote sustengua eta lau alkatek egin dute bat ekimenarekin, Baztan, Altsasu, Berriozar eta Gareskoek. Gainera, han izan ziren HBko Fernando Barrena, Koldo Lakasta eta Jaime Iribarren, eta EAko Koldo Amezketak.

Halaber, atxikimendua igorri zuten EPK-ko Pablo Lorentek eta CDNko Victor Maeztuk.

Orreagako ordezkari Bixente Serrano Izkok adierazi zuenez, Nafarroaren nortasuna indartu eta ezagutarazi nahi dute. «Bote-reguneek ezarri nahi duten amnesia aurrean, Baigorri Nafarroaren Egunean egiten duten bezala, hemendik aurrera abenduaren 3an Iruñean aldarrikatu nahi dugu sei merindadeen arteko berdintasuna, euskarak eta kontzientzia historikoak merindade guztiok batzen gaituela». Ekitaldian sei merindadeetako ordezkariak izan ziren. X



Orreaga Plataformak Merindadeen Eguna ospatu zuen atzo Iruñeko Foruen estatuaren pean.

MIKEL UHARTE